

HEADLINES

- Chief Minister Pu Lalduhoma hova Council of Minister vawiina thukhawm chuan Sethawna sorkarin a din ruihhlo ngai enkawlna hmun Jordan Center chu midang kuta hlan a thuphungin a remti.
- Kumin International Day of Yoga (IDY) tunkar zirtawpni a hman tur pualin inbuatsaihna kalpui mek a ni .
- Prime Minister Narendra Modia chuan vawiin khan Varanasi atangin PM Kisan Samman Nidhi cheng vaibelchhe 20,000 chuang loneitute tan a pechhuak.
- Italy-a raltlan lawng pilah mi 11 aia tlem lo an thi



## COUNCIL OF MINISTERS MEETING

Chief Minister Pu Lalduhoma hova Council of Minister vawiina thukhawm chuan Sethawna sorkarin a din ruihhlo ngai enkawlna hmun Jordan Center chu midang kuta hlan a thuphungin a remti a,

Social Welfare & Tribal Affairs Minister Pi Lalrinpuiin kan corr a hrilh danin, sorkarin a enkawl zuina tur sum a neih loh avangin, he centre hi midang kuta hlan a rel a, tun dinhmunah a enkawltu tur hi kohhran leh mimal engemawzat an hmu tawh naa, thuthlukna an la siam lova, naktuk atangin an bawhzui nghal dawn a ni.

Jordan centre hi thla 3 chhung April, atanga June thla thleng hian tihtawp lailawk a ni a, sorkar hmasa khan SEDP hmangin a lo kalpui tawh a, amaherawhchu tunah hian kalpui thei dinhmuna ding an intih tak loh avangin pawn lam mi in enkawlin ruihhlo enkawl dam hnua enkawl zuina aftercare leh skill development thlenga kalpui turin an duang a, hei hi pawn lam mi enkawl tura an thlanin a enkawl tawh dawn a ni.

Vawiina Council of Minister thukhawm hian sorkar khawih thudang tamtak an rel bawk a ni.



## ASF

Vawiin khan Animal Husbandry and Veterinary Dept chhinchhiah danin Mizoramah vawk pulhri -African Swine Fever (ASF) vangin vawk 100 thiin vawk 289 suat a ni a.

ASF vang hian Mizoramah kumin January thla atanga vawiin thleng khan vawk 2357 thi nia ropui a ni a, vawk suat tawh zawng zawng hi 4961 a ni tawh bawk a. Vawiin bika vawk thi zat hi Aizawl District ah vawk 29 a ni a, Saitual District ah 2, Khawzawl District ah 1, Serchhip District ah 68 niin a vaia Mizoram chhunga vawk thi zat hi 100 a ni a.

Vawiin vekah Mizoram chhunga vawk suat zar chu 289 a ni a, Aizawl District ah vawk 214 suat a ni a, Serchhip District ah vawk 75 suat a ni bawk a ni.

Serchhip District chhung N. Vanlaiphai leh Keitum khuaah tun hnai hian Vawk a thi nual a. Heng vawk thi te hi African Swine Fever (ASF) vanga thi an ni tih finfiah a nih tawh avangin thu leh awm hma chu Vawk hri lenna hmun "INFECTED AREA " a ni tih puan a ni a,

N. Vanlaiphai leh Keitum khua atanga vawk, vawksa leh vawksa atanga thil siam reng reng lakchhuah emaw lak luh khap tlat a ni.

Vawk thi reng reng paih mai lovin, chinai /Disinfectant nen thuk taka phum ngei tur a ni.

Vawk talh leh vawksa zawrh khap tlat a ni.

<><><>

YOGA

Kumin International Day of Yoga (IDY) tunkar zirtawpni a hman tur pualin inbuatsaihna kalpui mek a ni a,

Kumin thupui atan hian ‘Yoga for Self and Society’ tih thlan a ni a, Akashvani Corr in Ayush Programme Officer Dr Shirley Lalbiakzuali Chhangte a kawmnaah, Dr Shirley chuan mihringte nitin mamawh taksa hriselna, rilru hriselna thlen theitu chu Yoga a ni, a ti a, Yoga in sakhaw tihbik a neihloh thu leh nunphung zirna a ni a ti a. Yoga chu mihring theihna phochhuaktu leh tanpuitu a ni a, mahni leh midang te thatna thlentu atan a pawimawh thu leh Mizote’n Yoga an lo hmelhriat dan a sakhaw ang chi dah bo a taksa sawizawina atana a pawimwhna te hriat a tul thu a sawi a. Natna chi hrang hrang enkawlana atana Yoga chu hman tangkaina tur a tam thu leh chutiang enkawlana atana a pawimawh em em a ni a ti.

Tun dinhmunah Ayush hnuaiiah hian Instructor 12 an awm mek a, heng Instructor te hi District Hospital, Integrated Ayush Hospital, Thenzawlah te rawn theihin an awm mek a. Yoga Instructor awmlohna hmunah pawh Ayush Doctor te Yoga exercise chungchangah rawn theihin an awm mek a. Administrative Training Institute leh Ayush Dept tangkawpin trainees chi hrang hrangte hnenah Instructor pakhat kaihhruaina in ‘Yoga Exercise’ kalpui mek a ni bawk .

Kumin International Day of Yoga (IDY) hi khawvel hmun dangte rualin zirtawpni hian Mizoramah hman a ni anga, a lawmna pui ber Hawla Indoor Stadium, Republic Vengthlangah hman tum a ni.

<><><>

LADC BY ELECTION PREPARATION

Lai Autonomous District Council (LADC) hnuaiia Village Council inthlan neih tur leh Lawngtlai Chandmary bial MDC by election neihaturah chuhtumte tana hming pekluh hun chu vawiin chawhnu dar thum khan a tawp a, hming pekluchte hi naktuk chawhnu dar 3 atangin endik a ni ang.

LADC hnuaiiah Village Council 99 awmin General Seat 496 leh Hmeichhe tana seat hauh 99 nen VC Member 595 thlanchhuah tur niin, chuhtumte hian Returning Officer hnenah an hming an pelut a, hriattheih chin ah VC tamzawk chu kilthum atangin INC, MNF leh ZPM ten an chuh dawn a, kan corr sawi danin Independent a chuh an awm nual a rinawm bawk a ni.

Assembly inthlan hnuhungber a Lawngtlai Chandmary bialtu MDC Dr Lorrain Lalpekliana Chinzah chu Lawngtlai East bial atangin MLA a thlantlin a nih vangin he biala MDC by election neih tur ah, Party pathum BJP, MNF leh ZPM candidate ten vawiin khan Returning Officer Lawngtlai DC, Pu Cheemala Siva Gopal Reddy hnen ah hming an pelut. He bial chuhtur hian BJP atangin Pu K.Lalawmpuia chuan hming a pelut a, MNF atangin Pu C.Lalsawmzuala chuan hming pelutin, Congress chuan Candidate hran siam lovin MNF nen an thawkho dawn a, ZPM atangin Chandmary MDC bial chuhtur hian Pu F.Hrangtukhuma'n hming a pelut bawk.

VC inthlanna a Vote tlate hi Inthlanni June 27 ah vote thlak zawhah chhiar nghal a ni dawn a, Ballot paper hman a ni ang. Lawngtlai Chandmary bial MDC by election ah hian EVM hman a ni dawn a, vote hi July 1 ah chhiar a ni thung ang.

<><><>

#### ALL MIZORAM VC ASSN

All Mizoram VC Association chuan VC ten Sorkar an thawhpui that duhloh vanga VC Term pawh tawi tum niawm taka thu an hriat chu an hrethiamlo tih an sawi.

All Mizoram VC Assn chuan vawiin khan thuchhuah siamin VC te chu India ram ropui tak Democracy lungphum pawimawh tak pathum (3) Central, State leh Local Government zinga pakhat, Democracy Grassroot anlo tih hial, tualchhung Sawrkar , "The Lushai Hills District (Village Council) Act.1953" hmanga rorel tura mipui ten kum 5 atana an thlan chhuahte an ni a. He danin thuneihna a pekte leh Central leh State Sawrkarin Programme & Policy hrang hranga Agency atana a hmanna kawnga tha taka thawh chu an Duty, VC atana thlan an nih chhan a ni, an ti a. An duty tihhlawhtlinna kawngah mahni hna pawh thawk hman leklo a khawtlang leh ram tana an buai ve em em laia hetiang thu an hre ta mai chuan a thawng tak zet a ni, an ti a. Sawrkar thawhpui duhlo te chu khawi VC nge ni a, eng kawngin nge anlo thawhpui duh loh tih hriat an duh thu sawiin AMVCA anga lo in zilh a, tha taka Sawrkar thawhpui tura lo infuih thar leh an inpeih reng a ni an ti.

Village Council Term chu Panchayati Raj System Central Sawrkarin a siam zulzuiin kum 5 term tura tih a ni a. State Sawrkar in a duh chuan a pawt tawiin a pawtsei thei ngei mai a, mahse, chhan tha tak neia tih tur ni ah an ngai a. Village Council din tirh ata Covid-19 vanga thla 5 chhung MNF Ministry in a pawhsei bak kha VC Term kal lai tih danglam hi Sawrkar kal tawh ten anla tih ngai loh nia an hriat thu an sawi.

<><><>

#### PM

Prime Minister Narendra Modia chuan vawiin khan Varanasi atangin PM Kisan Samman Nidhi cheng vaibelchhe 20,000 chuang loneitute tan a pechhuak. Pu Modia hian Prime Minister atana lakluh anih hnuah vawiin khan Varanasi hi a tlawh a. PM Kisan Nidhi installment 17-na chu a hna a zawm hnu lawkah phalna a pe a. He hamthatna hi loneitu vaibelchhe 9.26 chuangin an dawng dawn a. Vawiin thlengin loneitu vaibelchhe 11 chuangin PM-KISAN hi an dawng tawh a. Sum semchhuah tawh zawng zawng hi cheng vaibelchhe nuai 3 leh sing li chuang a ni a. Hei bakah hian PM Modia hian Self Help Groups (SHG) atangin hmeichhe sing 3 te tan Krishi Sakhis Certificate a a hlan bawk a.

<><><>

#### PM YOGA

Prime Minister Narendra Modia hoin tun thla ni 21 ah International Day of Yoga chu Srinagar-ah hman a ni dawn. Union Ayush MInister Prataprao Jadhav chuan kuminah hian an thupuiin a tum ber chu mimal leh khawtlang thatna tur a thlur bing a ti a. Tunhnai kum chhoa mi tamtakin Yoga Day an hlut chho zel chuan a nghawng tha tak a tarlang a ni a ti.

<><><>

#### 11 DIED, 66 MISSING IN SHIPWRECKS OFF ITALIAN COAST

Italy-a raltlan lawng pilah mi 11 aia tlem lo an thi a. midang 66 chin hriatlohin an bo. Thudawn danin vanduaiana thlenna hmun hi Italy chhim lam Calabria tuuipui kam atanga km 200 a hlaah a ni a. Chhanchhuah hna hi ngawrh taka thawh chhunzawm nghal a ni a. Mi 12 dama chhan chhuah an ni a. Iraq, Syria, Iran leh Afghanistan atanga raltlante chuanna lawng nia hriat a ni.

<><><>